

JPS siap sedia 100 peratus

Oleh Mahaizura Abd Malik
mahaizura@hmetro.com.my
Kuala Lumpur

Jabatan Pengairan dan Saliran (JPS) bersiap sedia untuk menghadapi musim tengkujuh kali ini termasuk menambah pemasangan sistem siren, menempatkan aset seperti pam dan bot selain memantau stesen aras air dan hujan seluruh negara selama 24 jam.

Menteri Sumber Asli dan Alam Sekitar Datuk Seri Dr Wan Junaidi Tuanku Jaafar berkata, JPS sebagai ahli Jawatankuasa Pengurusan Bencana Banjir (JPBB) bersedia menghadapi musim banjir monsun bersama agensi pengurusan bencana lain bagi mengurangkan impak daripada banjir yang mengakibatkan kerosakan dan kerugian harta benda awam dan penduduk.

Beliau berkata, walaupun ramalan banjir berkurangan berbanding tahun lalu berikutan pertembungan fenomena El Nino dan La Nina, pihaknya melakukan persediaan sebagai langkah berjaga-jaga.

"Persiapan kita sudah 100 peratus, JPS sudah membuat pemeriksaan aset seluruh negara seperti perparitan, sungai yang cetek diambil tindakan, pam rosak diganti dan dibaiki, memastikan pagar berfungsi dengan baik supaya laluan air boleh dibuat seberapa baik mungkin ketika banjir berlaku nanti.

"Selain itu, 453 stesen aras air dan hujan seluruh negara

FAKTA
453 stesen aras
air dan hujan
seluruh negara
dipantau 24 jam

dipantau 24 jam di bilik gerakan banjir peringkat ibu pejabat dan negeri di samping pemasangan 440 sistem siren yang diletakkan di kawasan berkemungkinan berlaku banjir.

"Pada masa sama, aset seperti pam dan bot juga ditempatkan di kawasan strategik selain turut mengemas

kini penyampaian maklumat amaran awal banjir kepada orang ramai," katanya sempena Majlis Pelancaran Program Persediaan Menghadapi Musim Tengkujuh di Pusat Kawalan SMART di Kampung Berembang, di sini, semalam.

Turut hadir, Ketua Setia-usahanya Datuk Seri Azizan Ahmad dan Ketua Pengarah JPS Datuk Seri Zainor Rahim Ibrahim.

Sementara itu, JPS menerusi Pusat Kawalan SMART di sini, turut membuat persiapan bagi mengurangkan kesan banjir di ibu negara.

"Persediaan dibuat bagi memastikan keseluruhan sistem SMART berfungsi pada tahap optimum, malah kesiapsiagaan peralatan Sistem Pengesanan Banjir SMART sentiasa diutamakan dan diselenggara sepanjang tahun secara berjadual.

"Sistem Kawalan Banjir Terowong SMART ini adalah terunggul di dunia di mana ia berkesan menangani banjir dan sejak memulakan operasi pada 2007, ia berjaya menyelamatkan sebahagian kawasan Lembah Klang daripada banjir 182 kali.

"Kita minta JPS membuat kajian lagi bagi melihat kemungkinan membina sistem ini di tempat berisiko banjir lain," katanya.



DR WAN Junaidi (dua dari kiri) dan Zainor Rahim (kiri) mendengar taklimat daripada pegawai JPS, semalam.